

Regional News Unit AIR Aizawl
Monday, April 08, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizorama Lok Sabha inthlanpui atan party tinten theihtawp an chhuah mek.
- Thla 3 kalta chung khan Mizoramah Heroin Kg 40 dawn leh Meth kg 30 dawn man a ni.
- India rama political party hrang hrang hruaitute chu Lok Sabha inthlana an candidate-te tan ngawrh takin an campaign mek.
- Israel chuan Gaza Strip chhim lama an lei sipaite nimin an hnukkir.



POLL-CAMPAIGN

Mizoram Lok Sabha bial inthlanpui vote thlak hma-in ni 10 chuang awrh a awm tawh a, party tinin tlin tumin theihtawp tak meuh an chhuah chho tawh.

BJP Mizoram Election Incharge Devesh Kumar chuan Lok Sabha Mizoram bial inthlanna lo awm tur atana BJP official candidate Pu Vanlalhmuaka chu thlan tlin a nih chuan Union Minister a ni dawn niin a sawi. Chhim lam an fanna a Inrinni a Chawngte (Kamalanagar) khua a hun an hmanna-ah Devesh Kumar chuan Pu Vanlalhmuaka chu sap tawng leh Hindi leh tawng dang pawh thiam tak a ni a, Central-a sawrkar leh tur party, BJP candidate hi Mizoram mipuiin an thlang tling a nih ngat chuan Union Minister a ni dawn a ni a ti a. Chuvangin he hun tha hi bawh pelh lova, Mizoram hmasawna tha a awm theih na'n vote turin mipui a ngen a ni. Pu Vanlalhmuaka pawhin thu sawiin Chawngte chu vawi tam tak a kal tawh thu leh tun thlenga kawng a la chhe reng mai chu a vei thu sawiin thlan tlin a nih chuan kum khat chungin kawngte siam that vek a intiam a. Ram, hnam leh sakhaw humhalh chungin hmasawna tak tak Mizorama a thlen a tiam bawk a ni.

Congress party candidate Pu Lalbiakzama chuan kar hmasa tawp lama Hnahthial leh Serchhip district an fanna-ah BJP sorkar kal chhoh dan enin hnam leh sakhaw betu tlem zawkte tan a him lo hle a ni a ti a. BJP hi an sorkar chhonzawm zel a nih chuan Uniform Civil Code (UCC) chu dodal mah ila hman luh a ni dawn a ni a ti a. Hei hi Kristiante leh sakhaw tenau dang, tlangmite tan thil pawh tak a ni dawn a ni a ti bawk. Mizoram thenawm Assam assembly-in tihdam rawngbawlina hna thawh theih lohna tura dan a siam chuan Mizo missionary-te tan harsatna namen lo a siam mek a ni a ti a. Heti chung a BJP dodalna chang hre lova an lama tan sawimawi an la awm chu pawh a tih thu leh a tawpah chuan Mizoram mipuite tawrhna thlentu tur a nih thu a sawi a ni.

Lok Sabha inthlan lo awm tura MNF candidate Pu K. Vanlalvena chuan Lok Sabha inthlanah hian a lo tling a nih chuan, ram, hnam leh sakhaw him na'n theih tawpin a bei chhonzawm zel dawn niin a sawi. Inrinni a Aizawl khawpui hmun hrang hranga kawthlera inthlan campaign beihpui an thlakna-ah Pu K. Vanlalvena chuan political party hrang hranga 40 vel awmkhawmna NDA-ah MNF chu a awm mek thu sawiin, NDA-ah hian Kristian MP engemawzat an awm niin a sawi a.

Kristian MP-te'n NDA hi chhuahsan vek sela chuan Kristiante nek chepna a nasa leh zual dawn tih hriat a ngai a ni a ti. Hindu-te nek chep mek Kristiante thlavang hauha ding flat turin a chhung atana bei tura a thut flat a ngai niin a sawi. MNF hruaitu dangte pawhin Mizoram, hnam leh sakhua humhalh tur leh Mizoram chhehvela zofate thlavang hauh zel turin Pu K. Vanlalvena chu thlantlin a ngai a, Zofate leh Zoram tana mipui candidate a ni, an ti.

Inrinni a Champhai Vengthlang a kawthler inthlan campaign an buatsaihah Lok Sabha Mizoram bial inthlanna a rorellai ZPM candidate Pu Richard Vanlalmangaiha chuan Mizoram thlaitharte leh kut themthiam hmanga thil dehchhuah te pho chhuah na'n Delhi ah Sales Emporium buatsaih a tum thu a sawi. Candidate campaign puitu Sports Minister Pu Lalnghinglova Hmar pawhin thusawiin Mizoram atanga Lok Sabha inthlan lo awm turah candidate mi paruk zingah ZPM chuan central-ah zawmpui nei lovin ZPM MP a ni tawp dawn a ti a. ZPM chuan NDA emaw I.N D.I.A emaw a zawm dawn lova, 'issue based' in a thu a zir zel leh Mizoram mipuite duhdanin an kal thei dawn bik a ni a ti a. Candidate dangte chu a mimalin tumah tha lo a tih loh thu sawiin an danglam bikna erawh chu, tu thuhnuai mah ZPM MP hi a awm ve dawn lo a ni, a ti a ni.

<><><>

DRUG SEIZURE

Mizoram Police leh Excise and Narcotics department thawktute chuan kumin January ni 1 leh March ni 31 inkar (thla thum) chhung khan heroin kg 38 leh gram 360 an man.

Police Chief Public Relations Officer leh IGP (Headquarters) ni bawk Pu Lalbiakthanga Khiangte hnen atanga thu dawn danin thla thum kal ta chhung khan Police-in heroin kg. 19 leh gram 790 bakah Methamphetamine kg 27 leh gram 277 an man a. Ganja (cannabis) pawh kg. 27 leh gram 200 an man bawk a ni. Ruihhlo a inhnamhnawihte lakah thubuai 92 ziahluh a ni a, mihring 120 man an ni bawk a ni. Kumin chhunga an ruihhlo man, heroin, methamphetamine leh ganja te hi tualchhungah cheng vaibelchhe 10 leh nuai 60 chuang hu a ni. Hetih lai hian hemi hun chhung vek hian Excise and Narcotics department chuan heroin kg. 18 leh gram 570 an man a. Police leh Excise & Narcotics department-te heroin man belhkhawm hi kg 38 leh gram 360 a tling. Excise & Narcotics department hnathawkte hian hemi hun chhung hian methamphetamine kg. 106 leh gram 648 an man bawk a, Police-te man nena belhkhawm chuan Methamphetamine man hi kg. 133 leh gram 925 zet a ni.

Hetih lai hian Excise and Narcotics department-in an chhinchhiah dan chuan tun thla thum kal ta chhung khan Mizoramah ruihhlo hman sual avangin mi 12 an thi tawh a. An vai hian heroin leh damdawi dang tihpawlh vanga thi an ni a, thi zinga 10 hi mipa niin 2 chu hmeichhia an ni. Tun hnai-ah Heroin, Methamphetamine leh ruihhlo dang tawlhruk a hluar a, man pawh a tam hle a, hei hi a chhan ber ni a dan kengkawhtute'n an sawi chu a rawn kalna Myanmar mipui sorkar sipai chakna hmanga hnehchhuh a nih vang a ni a.

February ni 1, 2021 a sipai-in thuneihna an chhuhluh atang khan Myanmar ram, a bik takin Mizoram dep Chin state-ah sorkar inrelbawlna mumal a awm theih tak loh avangin ruihhlo tawlhruk hi tunhma aiin nasa takin a hluar ta a, man pawh a tam ta a ni.

<><><>

CCM

Synod Office J.M. Lloyd Hall-ah Mizorama Kohhrante Inpumkhatna (Council of Churches in Mizoram) Joint Committee an inhmukhawmna-ah chuan October thla lamah a taka thil kalpui theih beisei a nih thu sawi chhuah a ni.

Tun hnai a inhmukhawmna-ah hian kohhran hrang paruk aiawh an tel thei a, mi 37 an kal khawm a ni. Inkhawmah hian Council of Churches in Mizoram Constitution buatsaih chungchang te, CCM din a nih theihna tura Implementing Committee din chungchang te ngaihtuah a ni a. Council of Churches in Mizoram hi kohhran hrang hrang Inkhawmpui leh thuneitu sangte'n din tha an tih vek tawh a ni a, a ruangam leh a kalphung duan mek zel a ni. CCM-ah hian Mizoram Presbyterian Kohhran, Mizoram Baptist Kohhran, Evangelical Church of Maraland, Lairam Isua Krista Baptist kohhran, Evangelical Free Church of India, Isua Krista Kohhran, Bualpui (Ng) leh Salvation Army te tun dinhmunah chuan an tel a ni.

<><><>

ARMY RECRUITMENT

Central Young Lai Association (CYLA) leh 20th bn. Assam Rifles te Lawngtlai District huamchhunga thalai ten India Army an luh ngei theihna atan an thawk dun.

Central YLA chuan thalai mahni duhthlanna ngeia sipai tang duhte zawngkhawmin Assam Rifles ten Lawngtlaiah sipai tang thei turin an buatsaih mek a. Sipai tan tumte tan hian tuktinin Assam Rifles-te kaihhruaina hnuaiah an taksa sawizawiin, sipai intlar huna an taksa that dan tehfung hrang hrang hmanga tehna-ah an tlak loh na'n insawizawina hrang hrang tihpui thin an ni a. Hei bakah hian written exam an hmachhawna tura pawimawh hrang hrang zirtir an nih bakah Central YLA lam atangin he'ng Sipai a intlar tumte Training neihpui thin hi a vil tur bik inruatin an vil thin a ni. Pre-Army Recruitment Training thawkhathnaah hian thalai 40 velin training kal mekin sipai intlar hun hmasaber ah intlar tir an ni dawn a ni.

<><><>

TOP LEADERS OF VARIOUS POLITICAL PARTIES HOLD MULTIPLE RALLIES & ROAD SHOWS FOR LOK SABHA POLLS

India rama political party hrang hrang hruaitute chu Lok Sabha inthlana an candidate-te tan ngawrh takin an campaign mek.

Nimin khan BJP hruaitu Prime Minister Narendra Modi-a chuan West Bengal-a Jaipalguri-a vantlang inkhawmah thu a sawi a. Tun tuma Lok Sabha inthlan chu sawrkar laipua sawrkar chak leh rintlak siamna tur a ni a ti a. Sawrkar policy hrang hrangte chu khawvela India dinhmun sawhnghehtu a ni a ti.

Trinamool Congress hruaitu Mamata Bajerjee pawhin a party chu state chhung mipuite hmasawna tura thutiam nei a ni a ti a. BJP hmalakna chu bein Citizenship Amendment Act (CAA) hnuaiah chuan mipuite chu an in leh lo atanga umchhuah an ni ngei ang a ti baw. BJP sawrkar hnuaiah chuan mipuiten an sawkhua an biak phalsak n ni dawn lo a ti a, mipuite chu Trinamool Congress vote a, BJP paihthla turin a sawm a ni.

<><><>

WITHDRAWAL OF CANDIDATURE FOR SECOND PHASE OF ELECTIONS ENDS ON APRIL 8

Lok Sabha inthlan thawh 2-na tura chuh tumte tana inhnudawh leh theihna hun waviin hian a tawp dawn.

Lok Sabha inthlan thawh 2-naah hian State leh Union Territory 12-a Lok Sabha seat 88 atan tun thla ni 26 khian vote thlak a ni dawn a. Hetah hian Outer Manipur Lok Sabha biala inthlan la hmabakah pawh vote thlak a ni dawn a, Outer Manipur hmun thenkhatah chuan vote thlak thawh khatna April ni 19 khian vote thlak a ni ang.

Lok Sabha inthlan thawh 2-naah hian Kerala-a seat 20, Karnataka-a seat 14, Rajasthan-a seat 13, Uttar Pradesh leh Maharashtra-a seat 8 ve ve, Assam leh Bihar-a seat 5 ve ve, West Bengal leh Chhattisgarh-a seat 2 ve ve, Manipur, Tripura leh Jammu and Kashmir-a seat 1 theuh atan vote thlak a ni ang.

<><><>

ISRAEL PULLS GROUND FORCES OUT OF SOUTHERN GAZA STRIP

Israel chuan Gaza Strip chhim lama an lei sipaite nimin April ni 7 khan an hnukkir.

Nimin kha Hamas-in nikum October ni 7-a Israel a beih atanga an indo thla 6-na a ni. Israel sipaite chuan Palestinian chenna hmun dangte chu an la hual chhunzawm zel tur thu an sawi a ni.

Inremna tur chungchanga Cairo-a inbiakna tur a inmung mek a. Israel Prime Minister Benjamin Netanyahu chuan Israel chuan hnehna chang turin pen khat chauh a mamawh tawh a ni a ti. Hamas-in Israel mi an hrente an chhuah loh chuan inkahhai a ni lovang tih a cabinet-te a hrilh baw. Israel chu tlawm tur ni lovin, indawr turin a inpeih reng a ni Netanyahu chuan a ti.

<><><>

SLOVAKIA: PETER PELLEGRINI WINS PRESIDENTIAL ELECTIONS

Peter Pellegrini chu Slovakia ram President atan thlan thlin a ni a. Peter Pellegrini-a hian eptu candidate Ivan Korcok chu a hneh a ni.

Pellegrini-a hi Slovakia ram Prime Minister Robert Fico-a laina hnai a ni a. Ballot vote za-a 99.9 chhiarah Peter Pellegrini hian vote za-a 53 a hmu a, a khingpui Korcok chuan za-a 47 a hmu a. Parliament Speaker tang lai Pellegrini-an hnehna a chan chhan hi Prime Minister Fico-a huvangte pawh a ni theia ngaih a ni.

<><><>